

■ GLOSSA

I ha tutgà da mort. Sechseläuten.

DA SILVIO CAMENISCH

Il Ferdinand è mort, oje oje oje! Tge dunna ha chavaltgà uschia quest chaval a la mort? Tge trista naira sort e mort e tut per ina degna tradiziun la valita da mantegnair en vita. La chargia en sella per ils chavals en general, quest chaval mort en particular, è stada giustificabla, sa riscuoda in fervent ardent dal Sechseläuten. Noss veterinaris aposta per las mastergnanzas avevan preparà ils chavals cun sedativs!, cun ferm ritalin als avain nus calmà avant e durant ir a galop da las giadas enturn il Böögg ardent ed explosiuns.

Tgi less dumbrar las giadas che quests chavals, selecziunads d'ina emprima giuria, ina segunda, terza ed uschia enavant giurias (nus conuschain il lungurus procedere: nà dal dumandà premi Term Bel, in penis sumegliant, sche jau dastg dir, auters mo paratgan tuttina e laschan dir mai) las giadas che quests chavals selecziunads èn currids uschè insatge da absurd enturn il Böögg bain ardent tuttina betg en chailira chalur suffizienta d'explodir finalmain ed uschia empermetter ina bella stad.

La chargia, latiers il stress e la canera è stà



memia bler, el è mort. Durant ir a galop ad absurdum, 20 minutas e 39 secundas! enturn quest Böögg ardent è el tuppamain mort d'insuffizienz dal cor. In ferm e bun cor ha disditg, n'ha betg pli pudì!, betg quella paisa d'ina personalitad da paisa uschia. Bain ina mastergnanta l'emprima giada da la tradiziun, ch'ìl Böögg sez è era stà ina dunna ferma sin il schafott ardent quella giada, puspè ina giada.

Mument, mument! a quels da Pro Animals che vegnan qua sco secta bunamain. Noss chaval è curri a galop enturn ed enturn ed andetgamain tranter explosiuns da murters dà enturn e mort! Quel ha gi ina curta bella sort e mort, quel n'ha betg stui pitir, pitir, epi, epi murir sco quel en l'uraziun a e da Las steilas en idiom sursilvan (IS). Sco quai che gidanters voluntaris sin il

plazzal da mort Sechseläuten conferman era quel en vita ed è mort. Avant las Sechseläuten en possa ed anc durant en fossa! Ins ha tratg davent dabot dabot il cadaver mort. Dabot or dals egls, lontan dal cor. Tuttina gia millis selfie en circulaziun.

Per la veglia veglia tradiziun da mastergnanzas da burgais èsi nobel da currer a galop, er a la mort. La mort fa qua senn, quella semna qua cuntinuaziun. Il chaval è mort ma la mort è sa pajada per la tradiziun. Tge sbragian quels da Pro Animals?, da vulair far currer in auter onn enstagl ils chavals a la mort ils maister mastergnants enturn enturn a la mort. Fiss nobla mort da chevaliers a galop cun ductrina unitara per la chausa, na ves jau quai betg fallà? E nus qua radunads rugain per il proxim a galop a la valurusa mort!, nus quintain cun tai.

Agiunta: So, signur professer, hai jau dà tut da sbuccar ritems e chalur atmosferica sco noss maisters mastergnants scripturs rumantschs e sun mort! ma sper gea er da vesair insacur la bella levada en la rubrica Pitschnas scenas or da gronds raquints! en noss radio noss dachasa. Jau mangel, la speranza mora il davos. Grazia.